

四庫全書

集部

欽定四庫全書

江湖小集卷十一

宋 陳起 編

嚴粲華谷集

玉溪雪夜

雪霽天夜白月上江空  
明飲散客就船萬籟沉三更  
誰家竹籬岸摸索踈枝橫  
不著色與香令我毛骨清  
醉魂乘沆瀣看舞婆羅城

獨往

一逕歷紆餘獨往未到處豈曰巖泉幽心閑即真趣蕭  
蕭松有聲依依花自開樵翁向我笑問我從何來

昭君怨

欲洗鉛華淨那須畫手工玉顏翻自誤不似舊圖中

送黃炳

未盡連床話恁恁又語離襟期無限事書寄為君辭昔  
別已十載重逢還幾時孤舟明夜月何處照相思

望彭蠡

萬壑氣交會今知楚澤雄  
水明纔辨樹霧合忽迷空  
遠浦沉初月孤舟亂去鴻  
闌干已愁思漁唱入蘋風

春晚

向來得意在烟霞  
失脚黃塵負歲華  
過却海棠渾不省  
夢中猶自詠梅花

秋入

秋入蘋風白浪生  
癡雲未放楚天晴  
青山湖外知何處  
中有斜陽一段明

陽關圖

人人腸斷渭城歌  
誰獨持竿面碧波  
可是無情如木石  
祇應此地別離多

月夜與張輯論詩

涼露初長夜  
纖雲淨盡時  
幾人還對月  
與客共論詩  
苦思常難穩  
閒題或更奇  
不應誇末俗  
準擬古人知

自樂平閱視渡舟取道太陽渡宿地藏院

康山問民涉陽渡  
平地訟竭來招提  
宿疏峯結飛棟  
研

丹啓囊書點勘自成諷佛香觸深悟僧茗來清供陽頰  
嵐氣生鴻沒天宇空向來山中樂忽忽豈其夢

盤谷圖

聲利爭馳毫末間幾人能得健時閑不須展畫相撩弄  
昨夜秋風憶故山

見梅

絕憐生意上寒枝幾度巡簷錯恨遲數點踈花人未見  
窻間早被月明知

春歸

抵死連宵雨不休  
今朝晴景莫登樓  
杜鵑啼得春歸了  
風裏楊花點點愁

薦福寺

即戴叔倫故宅  
今號戴公堤

石徑秋痕苔蘚深  
誰將清氣潤修林  
戴公堤上古時月  
幾度涼宵照苦吟

招提遊

幽尋愜所適  
蘭若白石靜  
天籟鳴松壑  
古意滿苔徑  
清

泉醒客心啼鳥喚僧定留連不能去翫月歸路永

又

煩抱忽如遺僧境得清勝花發岩洞幽雲生牕戶冷來  
驂樹陰直歸棹川光暝遺思山蒼蒼半空聞夕磬

拾橡亭為黃炳賦

世上危機富貴身由來著意鬼神嗔到頭鐘鼎誰消得  
正要山中拾橡人

林和靖祠



白雲人已矣古屋自蒼苔林下誤疑鶴水邊空見梅市  
人携酒至歌女掉船回檢點幽棲處湖光似向來

元上人見訪

昔子青青佩重逢怪衲衣樊籠留不住雲水靜相依習  
氣餘詩句枯禪墮佛機東湖自塵外還帶夕陽歸

憶張輯

畏景如焚客路塵寂寥山店獨吟身多情唯有別時月  
低傍茅簷巧趣人

宿石潭寺寄黃炳

昨夜湖心共泊船一天星霧宿寒煙朝來極目無洲渚  
知採蘋花何處邊

畫梅蘭竹石

正憶吟牕占竹坡風煙觸眼奈愁何梅蘭只作從前瘦  
石上蒼苔別後多

春恨

馬上東風吹酒醒空將春恨到江亭飛香寂寞無尋處

煙映晚山深淺青

廬陵黃炳築亭所居侯山扁以赤松子自號赤

松亭長之官鄂渚為賦詩

仙人遺世不曾愁但欲相期汗漫遊  
亭長祇今閑未得南樓孤嘯望神州

霧中早行

行人糝糊畫中影高樹夭矯空際雲樓臺幾處半隱見  
三島夢斷猶紛紜

秋思

風落葉間殘點雨月窺牕下不眠人  
秋清一片無誰領  
併作詩愁入鬢新

松雪

陰崖未知晴松雪自在白可恨晚風顛飛寒亂苔石

次韻宴坐畫圖

京塵倦來歸故山喜還壁淡交松桂在昔別猿鶴憶晚  
知閑味深甘為幽討惑尚念身在山佳處恐未識看山

須全境一覽盡目力伊誰有巨神亭亭掛空碧吾聞古  
靈匠能事露翰墨盤礴溟滓初大素含黼飾妙手斡玄  
微鍊此石五色天機一呈露真宰惜不得寫出萬古愁  
蒼茫思何極煙村帶遠市雲樹出峭壁有人閑倚欄飛  
鳥亦自適俗間重小景局促無竒特五日十日畫大類  
宋楮刻誰會悠然心醉來眠對客

醑醑

東風暖送龍蛇起麗日晴烘玉雪香可惜開時春向晚

不教桃李見清芳

客裏

客裏何如度歲華  
春風香却一番花  
山行轉處聞鷄犬  
楊柳陰陰賣酒家

紀夢

煙島空濛一鶴飛  
天風滿袖自吟詩  
覺來猶似非人世  
花影欄干月上時

送張輯遊宣城

君撫淵明底樣琴肯於絃上要知音相逢塵事不掛口  
別去清愁總上心聽雨夜牀孤舊約看雲秋壑想幽尋  
他年跨鶴相過否應笑浮名雪滿簪

道中見茶花

朝來露濕欲寒天誰賞幽芳古道邊風味十分留貢焙  
浮花正自不須妍

巧夕添丁

書來知有喜客夢應維熊久作庭闈別遙知笑語同充

問非我願釣瀨是家風莫學天孫巧如愚肖乃翁

琵琶洲

琵琶古怨猶淒清何年一抹橫煙汀人言隨波高下如  
浮萍神鰲背負能亭亭不知水仙宮殿碧皎潔玉絃遙  
映雲錦屏胡沙萬里音塵絕獨與鸚鵡愁青冥天際歸  
舟認髣髴江頭寒月傷伶仃悄然夜久天籟起往往恍  
惚遊百靈秋風嫋嫋兮水泠泠俗耳箏笛兮誰能聽我  
眼如耳耳如鼻妙處不言心獨醒釣天住奏三十齡石



鐘水樂遺林垞豈有寶器終飄零一朝詆蕩開天扃帝  
命下取呵六丁陶梭共起變化隨雷霆古餘山色空青  
青

池陽道中

脫葉舞風過別岸濕雲含雨上晴天修途喜借晚涼得  
幽鳥一聲生翠煙

挽陳邵武

前輩聞如此今人見未多難將道介論不在語言科曹

監開華近樵川借撫摩鄉評最期望一夢只南柯

夜投荒店戲成

喚起吹松火開門問帶嗔隨行曾有米同伴幾何人亂  
稗鋪添薦殘籬拾作薪夜寒難得酒煩扣隔山鄰

被檄樂平至鳴溪渡有山與南豐軍山同名者

余昔從嶺庵謝先生夢得遊先生于吾畏友  
也豪於詩說軍山之峭拔暢其吟懷自昭武  
徙家於市山築室曰西牕以朝夕對焉嘗命

余記之余時從西牕樽酒論文為樂如是者  
十載今先生已矣感而賦詩

江西絕頂挿晴空此地山名偶自同喚起西牕十年夢  
一樽何處醉詩翁

重到地藏院

泥濘行良苦青山且眼前題詩如昨日倒指已三年僧  
榻寒宵雨漁村落照煙薄遊聊復爾終擬老林泉

寄張輯

不見吾張輯新詩何處吟身留江介遠秋入夜涼深燈  
影還家夢葢聲倦客心歸來及佳節細把菊花斟

建德縣梅山寺

公退逢長日清遊到寶坊山圍露天小徑遠引溪長苔  
壁晴雲濕松軒暑月涼鐘聲半歸路回首暮蒼蒼

叨第後日者自謂竒中索詩

兒時意氣謾騎鯨幾向欄干袖手凭今日逢君成一笑  
却慚窓下讀書燈

風雨宿湖心

渺渺平湖四接天，孤洲曾繫夜來船。  
持鞭又逐風塵去，却憶秋蓬聽雨眠。

新晴

滑路愁騎馬，晴天好放船。  
水紋搖倒壁，花影弄晴川。  
夢寐驅馳在，光陰少壯遷。  
心期猶浩蕩，搔首白鷗前。

舟中夜雪

落帆侵夜色，客思正悽悽。  
風撼瀟湘覆，雲連宇宙低。  
灑

蓬吹乍急欹枕聽還迷懶墮無清興誰人訪剡溪

七夕

纖巧逐時新誰將大雅陳天孫古機錦笑殺世間人

送戴式之

自小尋詩出江湖今白頭應嫌少陵讀不似子長遊風  
雨夜愁枕鶯花春醉樓吟邊消息好懷古問沙鷗

茅舍

村居遠城市獨木渡塘坳迸笋補籬竹落松添屋茅童

歸携酒榼客至得鹽包隨分山中好低簷燕有巢

憇田家

晝問田家憇相呼隔短籬負薪鬚引犢挑菜跣携兒沙  
井和鰕汲村春夾稻炊老翁評貴糶覩縷舊年時

過江東

落花時節過江東濃綠山頭間小紅野店日長春寂寂  
柳陰搖颺酒旗風

騎牛圖

乃翁騎牛驢馱兒松間提挈羣僮隨驢逢短橋兒回顧  
牛背推敲了不知

戲友人

今朝有清興無處覓詩人寺占房空鎖窓窺榻有塵尋  
芳知尚早報謁未應頻只在城中醉煙雲滿澹津

孤鴈

一鴈度岑寂空流音響哀雲沙天地濶霜雪羽毛推力  
小知機早心危見影猜蘆洲迷處所飛遶正徘徊



蒙齋先生賦張通守佚老堂次韻

拂衣歸去白雲閑，佚老堂中天地寬。  
黃髮可教供鞅掌，青山脚足對高寒。  
杖藜行樂春風軟，紙帳佳眠曉日團。  
林下未應忘世事，併煩寄語謝家安。

菊

寒林色枯槁，粲粲離菊鮮。  
冷艷無俗韻，孤芳弄秋妍。  
金晶與高潔，未覺陽和偏。  
豈無兒女花，誰能制頽年。

歐陽道士歸自臨安

洞穴雲生牕戶涼道人宴坐但焚香向來遊遍王侯第  
還似山林意味長

張輯馮去非話別

此夕真成別幽懷欲語誰梅花霜月曉獨起詠君詩

夜讀晉書

南來未省有良圖可更清談傲五胡撫卷興懷千載事  
一牕風露夜檠孤

千憇僧房

黃塵吹不到禪房  
牕紙風翻葉葉涼  
觸熱行來牽畫夢  
孤篷聽雨下瀟湘

憶山中

山中桂香滿無復  
向來遊官事何時  
了一年孤負秋

即事

僧屋藏深塢漁舟  
帶遠汀誰教雙白  
鳥來點暮山青

野興

身閑歸未得野興  
日悠然抱牘無來  
吏尋詩即散仙五

明松罅月座引石根泉有客知余意清風三兩絃

重九後五日遊齊山

官癡縛辰酉節物如相負茲遊未覺晚黃花落吾手沒  
鷗江自迥脫葉山新瘦淒涼千載心西風一搔首

湘中

千古懷沙恨淒涼何處論坐看宗國事安用一身存落  
葉西風岸孤舟半夜猿年年江月白為照獨醒魂

寓京城和曾左曹韻

日日思君君不知京塵染盡帶來衣客心正自傷飄泊  
更看湖邊花片飛

車馬聲中又日斜可堪芳草思天涯來時憶別山中桂  
今見長安梔子花

閑居

盡日門前草青青不染塵生書方破卷幽鳥忽啼春失  
意成高興多閑信懶身不須憂世事廊廟有經綸

觀北來倡優

見說中原極可哀，更無飛鳥下蒿萊。  
吾儂尚笑倡優拙，欲喚新翻歌舞來。

李賈携詩卷見訪賈與嚴滄浪遊

石屏新卷裏曾得見君詩，大冊煩來教平生。  
慰夢思高標去塵遠，古道少人知。汝與吾宗好風騷，更屬誰。

新竹

樹頭不動天無風，六月還當日正中。  
唯有滿林新長竹，別生涼意襲簾櫳。

月

只道今宵月出遲  
雲間不覺上多時  
夜深花影如清晝  
何處山頭一笛吹

二水聞角

少日鄉間不解愁  
閑聽畫角起譙樓  
西風依舊闌干月  
獨自瀟湘萬里秋

軍行

野人自說老為農  
舊識戎裝紙畫中  
近日軍行渾見慣

兒童嬉戲學刀弓

子陵灘

西風吹雨暮江寒  
想見當年獨把竿  
不是君王思故舊  
何人知有子陵灘

一榻從容話歲寒  
相忘共作布衣看  
雲臺諸子成何事  
萬古清風一釣竿

汎湖

四邊天共水漫漫  
身在鴻濛縹緲間  
忽見浮空青一抹



舟中人說是湖山

慈湖墨竹

先生萬慮盡空時  
元氣渾淪可得窺  
還有發生消息在  
揮毫煙雨一枝枝

戲筆偶然成此耳  
直將造化論鉛銖  
不知茂叔庭前草  
有此風煙一夜無

未開梅

老樹天機早潛回  
一點春寒梢方落  
蕾瘦影已精神冷

淡看前輩芳菲總，後塵更須香共色。未是覽花人。

客裏

客裏還來此，寒燈耿獨吟。一官江國夢，十載草堂心。木落秋聲小，蜚狐夜思深。驅馳空自許，冉冉鬢霜侵。

戲詩友談仙

君期汗漫遊，不敢問所適。贈別亦何有，當辦鶴一隻。還疑是凡羽，不任載仙質。乘煙寧假此，聊以壯行色。淹留非牽俗，應未得良日。空令施肩吾，久待問詩律。

秋懷

秋懷不到夢，歷歷數寒更。坐得楚天白，吟教湘水清。殘燈搖壁影，片葉墜堦聲。起看孤城霧，人間事又生。

初注清湘令寄馮深居

去非

深居定何處，無便寄聲頻。舊別芝山月，相思楚水春。白雲生夢遠，華髮折腰新。料得今書到，看題笑故人。

上饒界首傷曾殊

故人曾此賦，梅詩人共梅花。一夢非欲喚，青山話前事。

西風吹淚濕征衣

秋風

門與姑山對溪邊有故廬別來三徑菊開却一樓書水  
碓長腰米村船巨口魚秋風歸去好留滯意何如

戲友人

怪得詩情減一分知君為學有新聞塵中畢竟閑人少  
獨自開樽對白雲

早行

修程避晝炎中夜征夫起蟲聲荒郊迥犬吠衡門閉行  
行月色淡微霞露天際永懷高卧人幽夢繞蒼翠

西湖

何處春晴好西湖元已朝馬嘶堤上路船過柳陰橋敲  
竹窠聲起弄泉花影搖坐看遊客盡煙水思迢迢

閏九

前月登高去猶嫌菊未黃秋風不相負特地再重陽

顏范祠堂

顏范新祠菴水陽邦人來此識網常海波瀕洞孤峰峭  
天宇清明一鳳翔英蹟重尋餘古帖高情猶想賦秋香  
姦諛骨朽今安在三嘆前賢死不亡

張德慶挽詩

擢第家聲在通班宦路亨為親遲受邑未老謝專城活  
計詩書富歲寒梅竹清閑中將道眼醉夢笑功名九袞  
猶身健聯麾見子榮笏牀歡節序鳩杖話平生世久傷  
零落吾猶及老成酸風吹苦淚一為典型傾

調古

調古人能聽着長世共妍家山夕陽外心事落鷗邊弟  
妹知何在風塵祇自憐孤燈照危坐不是少林禪

道傍木犀

路人攀折半成荒何似山中自在芳可耐西風相料理  
為誰消得許清香

示園丁

種竹宜踈延夜月澆花須早起晨陰溪邊釣石勤時掃

恐有詩人來醉吟

舟中夜酌別鄧均

共對船頭月通宵語未終鄉關幾歲別筆墨小時同江  
影高低樹秋聲斷續鴻相逢彈草草明日又西東

發清湘

歸棹將秋色三相是勝遊灣回仍小嶼灘過盡平流臨  
水聞僧磬隈岩隱釣舟江頭每佳處沽酒小夷猶

花樹移方活丁寧莫損殘待逢春意暖開與後人看酒



任隨車載詩從就柱刊料應吟賞處說著種時難  
我樹未花開其如行色催遙憐今歲雪誰看一庭梅餘  
俸刊詩卷歸程賣酒盃輕舟下灘穩鷗鷺不驚猜

繫舟

古岼人家少蒼茫此繫舟閨中今夜月江上晚風秋一  
水縈寒夢雙鴻亂遠愁湘源知不惡吾意肯淹留

夜行舟

忽報風波息梢人倚柁看開船星斗轉吹笛水雲寒犬

吠知村近鳥啼覺夜闌兒童將白石敲火趁晨餐

道中

客思曉寒凝初陽樹外昇氣蒸茅屋雪聲裂野池冰倦  
路行偏遠思山隱未能僕夫愁過嶺遙指最高層

冬日同趙與臻閑過雷園

地幽元在郭景好即為春相約同來者能閑有幾人風  
池行墜葉晴隙走游塵共爾煙霞契交情淡更親

寄鄧均

題書對殘燭幾日到江濱故里經年別清秋此夜分闌

映雨風細慢移雲數鴈聲初過知闌

任機宜新圃

小斲煙苔地春生一笑間亭邀鄰圃樹臺挹隔城山幽  
夢壺天曉清時幕府閑旋移花盡活容我醉來攀

岳麓寺

幾層攀石磴高寺白雲邊臺舊懷人古泉幽想霍僊遠  
帆相浦樹暮角楚城煙長是登臨處滄洲意惘然

吟到湘江倚釣蓬  
秋風日日望空濛  
偶來上到闌干處  
却指孤城夕照中

次韻菊花山人沈莊可見過之作

借得山中集塵埃  
一半侵讀來知句好  
老去向誰吟  
高義先投刺  
忘懷肯抱琴  
茅齋亦相約  
樽酒要同斟

重過雷園

靜處人來少  
園扉本不關  
寒叢淒古徑  
落日思空山  
倚樹吟情遠  
臨池立影閒  
晚林看更好  
一抹冷煙還

湘川

闕

分闕

幾年乍逢如未識相問闕悽然月

色秋看

闕

聲夜聽圓醉來共鄉語不覺是湘川

兵火後還里

十載青山幾戰塵還家何處訪親情  
兒時巷陌今難認  
却問新移來住人

宿澤心

自從孤棹背鄉關幾度麻姑夢裡山  
此地不知何洞府

石間松蔭水潺潺

夜發湘城

西風吹客衣一舸載書歸肯為身謀便而令心事違艣聲江月碎人影水煙微漸覺寒城遠沉沉擊柝稀

雪梅

報道梅邊雪未休披衣晨起上簾鉤孤根清健元如許空為花寒一夜愁

定王臺觀雪

清晨吟思獨憑欄十二樓中白玉寒此地古來風雪裏  
有人惆悵望長安

闕題

闕客闕

竹傲睨若無人風神闕岩谷主

人延客闕

山中酒新熟飲酣出素書闕篆不可讀欲問

度世訣長嘯振林木軒然別我去舉頭但黃鵠

樂齋

顏巷當年事同門自少知誰言公子貴心與古人期望

柳尋花意吟風弄月時人琴無處問空想考亭詩

琴

孤松風下絃秋清湘江湛湛湘山青一聲吹入天冥冥  
何處白鶴飛來聽

菊

秋籬霜露寒獨立爾良難不作過時恨從教耐久看風  
流沾臘蘂臭味憶騷蘭孤淡逢心賞幽香故未闌

大虎頭灘



聞說前灘大虎頭行人愁絕欲回舟世間多有虛名誤  
不見錢塘海逆流

過回鴈

闕

南來知闕

到青湘


客裏今年月相逢幾處圓行穿湘水際愁到楚雲邊屋  
內燈明路椽間瓦見天州城何處是遙指隔山煙

旋摘盆柑

金九手自摘色味香三絕從來天者全風韻迥然別

叅蒙齋先生

陋巷頽然號庶幾更無言說最精微何人叅了闕



江湖小集卷十一

欽定四庫全書

集部

江湖小集卷十三至十四

詳校官中書臣張姚成

助教臣常循覆勘

覆校官主事臣龔敬身

校對官助教臣胡予襄

欽定四庫全書

江湖小集卷十二

宋 陳起 編

毛珣吾竹小藁

唐乾元中元結序篋中集有風雅不作幾及千年之  
歎蓋為沈千運獨挺於流俗而發柯山毛元白詩人  
之秀者也通今達古著蔡後生採詩之家得其一二  
如寶肆中犀壁混於螺月惜其以文自晦不求於時  
吟藁一帙章不盈百清深雅正跡前事而寫芳襟深

有沈千運獨挺一世之作奚祇嘲弄風月而已哉千  
運之詩世不多見元白馳軼駕於天壤間豈不能接  
殊響於當世我師古人喜而序之寶祐六年戊午四  
月八日荷澤李龔和父

西興

蚤暮船爭渡都城隔岸間昔為漁釣地今住利名關潮  
探塵中事年催客裏顏水僊花又發吾欲老江灣

寓池之清夷堂

堂靜草侵廊羈懷未易忘  
近城知郡圃有佛即僧坊  
惡句書盈壁空樽壘到墻  
使君臨寵外滿月樹蒼蒼

送客遊吳

水鄉秋易冷珍重過吳松  
在旅雖難遣於詩莫厭攻  
一輪僧寺月半夜客船鐘  
况有賢州牧知音是舊逢

小至

九地陽初動披衣起擁鑪  
門前初去馬窗外漸啼烏  
雲色呈金未梅梢破玉無  
焚香待天曉點易自研朱

廬山棲賢寺

名重於諸刹前賢舊隱踪無人知有路滿樹忽聞鐘瀑  
壯山疑裂雲深寺若封或傳遺藁在三叩昔時松

登黃岡清淮門

風吹蘆葉江頭路江水江天共秋暮邊淮寒早客行稀  
只有征鴻向南去征鴻自去書不來遠衣未寄憑誰催  
孤城慘咽暮笳起城下荒榛接淮水

種竹



山居無力塵居俗有客勸予惟種竹種成貧家可驟富  
翠色琅玕遶君屋清晨荷鋤斷溪岸分得溪光入城綠  
暮年百事課功遲坐待春風滿林玉

墨龍

真人尸居雷八荒斷碑殘墨生蒼茫  
兒桓下睪九淵黑神光倒射角與亢  
平聲明明元氣淋漓蹟水底焚槐海  
波赤周流萬化元無極姑使人心識天則

湘江

湘江誰道無情水  
寶瑟聲寒愁帝子  
安知日月在中天  
萬古重瞳元不死  
楚南楚北千里雲  
持香遙禮雲中君  
莫起悲風助騷怨  
蘭枯菊瘁不堪聞

東風

東風煦嫗如慈乳  
欲報生成恨無所  
自粘花片作班衣  
起捧春醪勸春舉  
傍人笑我老如許  
我亦笑渠將及汝  
梅花也笑柳都舞  
君如不飲出童叟

浙江潮

白鷗舊事隨波去太極陰陽自吞吐長虹夜貫黑頭船  
四紀沙迎相公路馮夷作劇真等閑五都有客雄其間  
上林三官浪憂國千年海底生銅山

檜瀑

媧皇失補天南角一道銀河落君屋又疑元氣自周流  
不然瀉盡誰能續瀑邊老檜尤可人髯踈骨瘦皮鱗皺  
崩崖欲壓全不懼夜半潛蛟暗來去

富川邂逅戚叔開

百蟲𦉳蟄鴈奔忙君從何來兩袂霜大冠如箕蓋齊魯  
此地無乃驚吠厖釣竿曾笑江河窄尺水無容投轄介  
客取羝為君向東轍一聲裂石扶桑白

虎丘

阿鴻血染吳苔碧氣徹重泉埋不得十年至寶復歸天  
顛倒海中飛霹靂至今荒怪列虞初罅石千尋駭遊客  
寺邊別廟是何神月黑伽藍問周易

月

人言月裏仙人住，隱躍婆羅樹根。兔玄霜搗就亦多年。  
不見有人曾得度，清光偏照邊城。秋城邊白骨胎。玉侯  
玉侯白骨卒未已，龜蚌吸月獨不死。

丹陽館

渡江第一南來驛，幾度華堂延鴈客。百年運逐曉雲空，  
愁殺鞦韆宮老無職。南徐今日古陽關，不斷歌聲祖離席。  
國讐已復事尤多，折損年年春柳碧。

富池廟

船頭蜀錦三千尺倒影長虹浸寒碧相逢不是紫髯郎  
鸚鵡洲邊眼生棘江頭蕭鼓雜靈鴉人道陰兵曾護國  
安知樓下雪千堆不是吞曹氣衝激

秋日即事

黃花暴日香欲醉黃蜂抱香暖欲睡老夫邂逅亦欣然  
一段先天畫前意喧喧歸雀聒叢萱夕風欲轉明朝霜  
花搖蜂醒我亦覺斜陽一片秋茫茫

甲午江行

百川無敵大江流不與人間洗舊仇兩國久通三聘使  
諸公忽負百年憂邊寒戰馬全裝鐵波闊征船半起樓  
一舉盡收關洛舊不知消得幾分愁

寓興國之十詠亭呈諸友

斷垣荒棘疑無路忽有幽亭一畝餘不稱郡侯來把酒  
偏宜野客借觀書臨堦汲水防苔滑隔岸看山愛柳疎  
非有舊交時下顧十分風味落樵漁

中年

中年已悟昔皆非正學無師更可悲詩道縱能通閩域  
聖經曾未涉藩籬擬從周子參無極更為東萊續近思  
適意舞雩時一詠區區何用苦吟為

寓泉之定空寺

齋鐘聲斷佛香銷閑步虛廊轉幾遭濁世自緣君不捨  
青山豈是俗難逃鳥如留客音聲好松似騷人意氣高  
因悟夙根元自有栽培功淺長蓬蒿

掩卷



盈箱積案欲何如  
誤盡蒼生半屬渠  
陸贄外誰無負學  
臯陶前是讀何書  
鑿開素樸惟三畫  
斲碎真淳遂五車  
安得六經行世外  
民風盡返結繩初

謝胡默堂

瓶新小閣盡難成  
肯借山翁養病身  
萬事不憂知有命  
數椽分庇可無人  
觀書漆几明于鏡  
欹枕藤床軟勝茵  
終恐傍門心未穩  
敝衣雖敝每馳神

寓泉之安溪

已恨逢人語不通更堪烟嶺隔千重山城縱是如花好  
海霧終愁似墨濃遠信斷無鴻可寄故鄉惟有月相逢  
間于荔綠蕉紅處步履時留到晚鐘

雪

無雨無雲曉色乾忽驚瑰壁滿簷端不教聲到窻前覺  
應恐愁添屋下寒占瑞農官尋玉尺析醒公子索金盤  
柴門睡起無多事捲上疎簾帶竹看

關心

關心歲月似驚波，少日無成奈老何。  
別久帝京知事少，住長客久識人多。  
典衣沽酒盃難滿，借壁題詩寧易磨。  
早信出門無遇合，故山只合守樵柯。

通之海山樓落成

千尋雉堞一朝興，五馬行庖此落成。  
地峻鬼神愁設險，樓高星斗聽談兵。  
霞羞綵幟依山歛，月闕金盃出海明。  
更有萬堆飛石在，屹如八陣鎮南荆。

鳳凰臺

江山依舊昔人非多少興亡問不知鴈去又逢重到日  
鳳歸安得再來時風吹木葉隨漁艇霜壓蘆花出酒旗  
特地待吟吟未穩數聲昏笛戍樓吹

學道

學道先須學忍貧緼袍蔬食當華珍  
樞衣所欠參前輩  
開卷猶欣見古人  
暗坐雨窻心似月  
冷眠雪屋氣如春  
向來酷意耽吟事  
今亦相忘越與秦

贈碧幹

鳶飛魚躍兩悠悠造物何心莫問休但得一盃長在手  
不須萬戶更封侯人間有夢何非蝶物外忘機即是鷗  
我亦青鞵行脚者會摩銅狄話重遊

人才

但得人才即治安不憂外侮敢相干學闢世道方為士  
業曉農家始是官國力在兵堪用少朝奸如賊欲驅難  
豈無一代奇男子抱膝無言靜處看

和張梅深四首

金八  
卷十二  
幾踏槐花角寸長  
擔簦羞作老來忙  
立身早慕千層塔  
閱世今知百戲場  
從辟穀來惟嗜酒  
自栽梅後不燒香  
人生底為青衫急  
亦有秋荷可製裳

其二

不用悲歌撫缺長  
古無人可免身忙  
存心未必耕無地  
涉世難忘選有場  
新別水雲書尚濕  
舊題松桂筆猶香  
只緣誤觸神丹走  
惆悵京塵浣薜裳

其三

我策曾無一策長  
一生蟻踏厯間忙  
持經佛寺新投社  
寄食田家舊築場  
古劍放教龍逐律  
殘書分與蠹餐香  
不愁死去無名在  
化作千年老鶴裳

其四

鳧鶴都休較短長  
靜非無用動非忙  
閒將詩卷排科甲  
戲把文秤列戰場  
無地可施行話柄  
有天須監格心香  
功名細看時來耳  
珍重漁蓑即袞裳

古出塞

初說成漁陽俄傳出定襄朝朝征馬過春草不曾長

山月

山月共徘徊山泉酌一盃詩成無筆寫畫石記蒼苔

書墨竹

伯夷有夙世契子猷結千古交烟外三葉五葉雨中一

梢兩梢

觀星

九天有象不虛呈歷歷都關國重輕漢容可無經濟意



只將牛女問君平

海陵

遶城無數菜花黃  
隔岬蒹葭接大荒  
不分塞鴻偏得意  
年年春老未還鄉

海陵之堡城

四面蒹葭水接天  
中間一片是人烟  
相逢盡喜干戈息  
白鷺飛來立戰船

傍城三十里芙蓉  
怪底繁華浙景無  
元是近邊農事少

全憑蓮藕當官租

邊聲藉藉早秋風  
稻未黃時棗又紅  
莫厭水鄉遷避苦  
全家影入綠荷中

儀真

頻年歲稔少干戈  
到處人能販五河  
只道離舟偏輻輳  
玉盃錦段近年多

多肯樓邊古柳斜  
龍淵寺裏隔荷花  
清風盡日無人管  
半屬僧家半妓家

販來北棗堪克膳種得西瓜可析醒總是中原舊風物  
不堪今日是邊城

晚涼

窓前灑地著胡床浴罷閑來坐晚涼更取壁燈移暗處  
待他月上竹邊墻

南山有梅花

南山有梅花高者五丈餘半空發清香天人為踟躕城  
中三尺本登盆綴流蘇進之畫堂上笑彼何麤疎

山中吟七首

幽幽山上松泠泠松下井白石當銀床青蘿作修綆山  
翁獨酌餘無客可堪請葛洪分煉丹陸羽求煎茗

其二

采薇作庭實紉蘭作筐篚持以薦王公謂可蘋藻比王  
公齟齬謝王門何用此問客姓與名或是孤竹子

其三

山中夜讀書山鬼來相試隔窻問疑難頗及堯舜事予

非如金人安能動星緯劃然一推窻餘音入空翠

其四

山翁不能文亦免時流笑早愛滄浪歌知詞不知調長  
年山水間所業只耕釣偶得千齡龜遂通八卦兆

其五

山花開滿枝山鳥啼無時君胡欲棄此自取塵汙為山  
猿噉君履山鹿啣君衣挽君君不留去去君何歸

其六

榭葉可以衣松實可療饑騎鹿下山去擬說高人知高  
人不可得紛紛却語誰曉窗白雲過且自相同歸

其七

題牋寄親友早早山中來紫芝既可採蟠桃行當開持  
書託南風北風復吹回愛之不可見落日令人哀

己酉客淮

烽燧春尤急人才歎寂寥恨無黃石畧難致碧幢招守  
塹宵仍甲防城曉未橋又傳經一雪殘哨亦蕭蕭

過黃山法華寺

積雪滿松崗茲行為悼亡本非求吉地祇欲近禪坊外  
物心如水流年鬢已霜只應雙卜宅永此禮空王

送田耕月遊吳

衣笈詩囊外身輕費亦輕不妨船眼窄時上岸頭行櫓  
里逢霜信松江問水城吳中聞歲稔新糴想須平

登橋仍問渡迢遞到吳中倩僕挑茶竈移船避釣筒月  
生林屋洞潮接館娃宮得句人傳去蘇牋價益穹

此去姑蘇郡都無五日程仍聞新太守最重舊交情有  
句梅邊索無田月下耕雙親方待養吾亦勉君行

溇江

遠樹一重重烟村與市通難尋元亮宅遙酌菊花叢蜀  
浪帆檣外廬山几席中何時邊事息來此作漁翁

吳門田家十詠

去年一澇失冬收逋債于今尚未酌偶為灼龜逢吉兆  
再供租約賃耕牛



竹簪兩兩夾河泥近郭溝渠此最肥載得滿船歸插種  
勝如賈販嶺南歸

到處車聲轉水勞東鄉人事獨逍遙一堤灩灩元非雨  
總是吳江淡水潮

今年田事謝蒼蒼儘有瓶罌卒歲藏只恐主家增斛面  
雙雞先把獻監莊

主家租入有常規十月開倉不許違占得頭籌先衆了  
繞身紅綵送將歸

西鄉本是最髙鄉今歲收成亦倍常瓦鼓綵亭連日鬧  
誰家不謝白龍王

村村笛鼓樂秋成露未凝霜水未冰無賴酒家偏罔利  
隔年早掛上元燈

田家少婦最風流白角冠兒皂蓋頭笑問傍人披得稱  
已遮日色又遮羞

長襟侈袖若僧衣閑蕩扁舟入郭嬉好是醉歸村舍晚  
聲聲耳畔好郎兒

主家文榜又圍田田甲科丁各備船下得椿深芭土穩  
更遷垂柳護圍邊

劉寺

曾住昭陽殿裏頭何年香骨掩荒丘虛傳碧落歸仙去  
誰見蒼梧從帝遊鸞閣粉銷塵影暗蜃爐香冷石人愁  
風前不敢攀梅折猶恐君恩寵未休

宿廣果寺

寺門初掩夜沉沉風逼寒燈檜影深滿屋異香僧入懺

一甌新茗客搜吟雲歸古殿聞龍氣月照空池見佛心  
坐久却眠眠未穩屋頭鐘起鵲驚林

金陵

虎踞龍蟠在目前依前行闕鎖寒烟津頭鼓角增新戍  
陌上笙簫減舊年高塔直看淮對境斷碑閑憶晉諸賢  
我來尚喜秋成日魚蟹堪賒滿市邊

拄杖

數節堅如玉削成幾年出入伴閑身扶持衰老非無術

變化虛空亦有神  
藥籠倒挑同入市  
酒壺斜掛共尋春  
雖然未作顛危用  
閑指迷津與路人

數椽

梅有清香竹有陰  
數椽於此寄幽深  
舊看落鴈拋孤旅  
新聽啼螿悔苦吟  
幾卷書皆先世迹  
一張琴是古人心  
柴門未必無知己  
何必江湖在遠尋

陳藏一山房

一室焚香即太初  
萬人如海儘從渠  
第於心上曾無著

何必山中始去聲可居垂箔護花嫌引蝶連筒汲井怕生  
魚草玄政不妨人事問字敲門未可踈

元日寓越之三江

客裏元正最可憐就他香案禮蒼天懶拈蒼草占新歲  
頻對菱花憶去年僅有邱翁分席拜不如野老著衣鮮  
百年草草渾如此且醉殘梅了目前

桂

天上分來種異常年年花占菊前黃堆將龍麝應難敵

隔盡屏帷亦透香  
此日且饒秋富貴  
全家疑在月中央  
明朝酒醒風吹盡  
羸得黃金滿步廊

滄浪亭

濯纓人去水空寒  
事屬明時欲問難  
日暮客歸園館閉  
鷺鷥飛上石棊盤

子美故物惟石枰存

石淵

一片湖光接薜蘿  
功名餘事屬吟多  
至今魚鳥皆堪敬  
曾見烏中照碧波

江湖小集卷十二



欽定四庫全書

江湖小集卷十三

宋 陳起 編

鄧林皇芩曲

皇芩里曲耳詩不里號之里何居謙也偉鄧性之之  
為詩泐泐者雅學豐詞不餒正氣充體不頗卷若窄  
籠今古之變濶篇若少挾乾坤之蘊多視代間聾音  
浮響家遼矣蒙叟有知是當起大聲不入里耳之嘆  
皇芩哉詩世業乃精無六一有葉否無東坡有過否

有彛叔即有性之彛叔詩工如柳煙鶯曉障杏露蝶  
春糧如桃葉渡江狂子敬梨花帶雨澹真妃皆奇性  
之菴出此有夷仲即有彛叔仲叔季父也東山楊  
伯子題仲集云半山絕句人以王二十八稱夷仲七  
言請以鄧五十六稱彛叔又出此夷仲騷彛叔豪性  
之固應高杜氏一門審言也甫也荀鶴也越世之三  
傳也詩品人品荀鶴俱下也鄧之傳三世繼也性之  
非荀鶴比也淳祐十一年至朔大山蕭山則序

南國有佳人

南國有佳人仙姿自蓬島龍綃照明璫鳳釵橫貴寶新  
粧試鸞鏡皎皎顏色好芳年倏已笄君子可偕老奈何  
行媒弱修言棄中道洞房閨悵悵琦璜結組縞寧作鐘  
離春勿學姑瑤草

效晉樂志拂舞歌淮南王二篇

東昏侯 自言安 仙華玉壽 浮雲端 繡窻錦幔  
飄飛僊 丹青美女 侍七賢 侍七賢 奏笙歌

笙歌逸響 哀怨多 苑中花木 費綺羅 我欲踰

城 城有圍 願作雙黃雀 栖瑤池 栖瑤池 辟

塵垢 至尊屠肉 潘妃酤酒 石頭江上 龍駒走

三月春風 弔楊柳

唐明皇 自言榮 金輿翠輦 游華清 廣寒宮殿

凝水晶 霓裳羽衣 沈香亭 沈香亭 汎流霞

流霞潏灑 隊正家 誰知野鹿 銜宮花 我欲渡

關 關有兵 願作雙丹鳳 蜚瑤京 蜚瑤京 慙

煙霧 錦綉酥酪 香囊塵土 劍閣縈紆 家何許  
梧桐葉葉 鳴秋雨

劉阮

鹿車小宇宙 據鞍常醉眠 風塵瀕洞時 杯裏全其天 伶  
達故自佳 藉放乃無用 試看勸進表 何似酒德頌

東山彭澤

乞靈風鶴屐 折齒壁後真人汗 如洗樵漁雜 沓坐林間  
蟬游塵埃不可攀 石頭擾擾柴桑間

任彥升

鈴縣四角五采旗分明天產真英竒阿堆文章妙一時  
士林往往推元龜楊梅密領仁且慈桃菜麥飯清堪師  
何愁不得中書為半生紆意梅蟲兒

陶通明

眉疎目朗姿圓通詩書萬卷羅心胸華陽三茅仙洞中  
鳳笙隱隱和松風薪林圖識呈梁公朱砂曾青霜雪容  
服之身體飄輕鴻積金澗泉東復東山中宰相那無功

昭陽竟作單于宮

綠珠詞

涼臺瀟灑臨清波  
幄翠簾珠明綺  
羅哀絲豪竹按清歌  
紅潮素臉春風和  
主君歡娛美人醉  
報有無情使車至  
幾散蘭麝俱委塵  
獨指綠珠可當意  
衆中偏是承恩深  
妾身雖賤無二心  
君前判命効一死  
玉笛收聲紅日沉  
輕裾飄向闌干角  
花鈿散地金釵落  
到頭不負齊奴約  
猶勝識字空投閣

玉兒

金蓮華上俞尼子永壽神仙羅繡綺苑中荆荻市令嚴  
玉像支離瓦官寺六宮鴨刺起淫風太白便應懸妲已  
此身肯許兜鍪夫猛為東昏判一死到今羞殺賣降人  
去作練兒梁姓臣

菟繭吟

有繭大如菟其來自扶桑繅成白雪絲一縷萬丈長染  
人嫁五色妙織雲錦章奇文雜經緯紈素無晶光相纈



時所愛輕踈貴侯王緇衣不可作此物間篚箱袞職豈  
無闕終當補虞裳

結友四清

飄風吹游塵古道少人行涇水化為泥滄江汙吾纓嗟  
余佻工巧世外陶間情衆芳怨蕪穢不忍施菜盈庾嶺  
姿皚皚渭川色青青三閭闕秋思九韶鏗樂聲蕭然庭  
宇中對之成五清滔滔揚波者劔首一映輕靈修儻見  
知冰霜憺媵名

次韻陳鈞甫郊行

黃塵敗素意出門慙郊行  
埜菊含冷皸巖松起寒聲  
高  
山唐業崇流水晉時清  
拾薪歸底用石鼎待彌明

關山月

關山夜月明王分彩照胡兵江將軍擁節起古樂長戍

受降城江焚烽望別壘陸欲驗盈虛駛張是塞笳將夜

鵲阮戰氣今如此徐重關掩莫煙賀力雲陣上祁連徐

思婦高樓上徐遙心萬里懸賀力

陵 收

卓

陵

收

陵

題劉功夫與畊堂

默耕原不外靈臺何用錢添百屋堆甘雨每從和氣出  
祥風常自善心來畛畦有礙皆除去境界須寬更放開  
種德欲如多黍稌本仁先且護根荻太平國裏青精飯  
永熟鄉中玉液杯會得遺安龐老意力行好事厚栽培

書懷

西風吹羽扇吾道竟淒涼上坂勞騏驥低巢窘鳳凰可  
求非富貴無用是文章冉冉深林底幽蘭正自香

真陽峽

滿眼皆吟料歸囊未盡空江波連岼碧野火張天紅高  
樹留寒日長蘆轉晚風客身雖小艇心已故山中

凌江灘

灘高舟去緩間眺暮江濱竹本沙痕舊茅葑燒色新青  
裙瓶汲澗白帽斧尋薪渺渺蠻烟起秋風一旅人

近况

近况只如此深山無見間二中猶學道三上漫攻文芸

葉春繙日梨花曉夢雲添香仍煮茗嚴敬事天君

早過劉功父清溪

月裏山河大風前草木涼  
征塵生杖屨香霧濕衣裳  
古嶺板栖鷓荒蹊蹴聚蝗  
白雲看未遠已轉九回腸

曲江歸舟

只道蓬低礙覓詩眼前物色自多奇  
千山赭去如秦樣一水清來似晉時  
漁父豈無緣葦輩樵人恐有負苓師  
僮奴忽報梅花動春在江頭最北枝

村居

古來村裏起功名當日南陽亦是耕  
幾筆遠山仁者靜  
半篙流水聖之清  
晚風蟬響勝金奏  
夜露螢光即火城  
人得一閒高一著  
不須史論又詩評

感興

竹帛功名九折車  
栖遲巖野竟何如  
浣花溪上尋佳句  
積穀山頭讀異書  
江左風流空蘊藉  
淮南煙景尚凋疎  
太平十二河汾策  
策策欲排雲謁帝居

蛟峰先塋

獬蛟蟠伏鬣封孤雲暗幽亭日向晡雙柱千年翔化鶴  
四山半夜泣於菟老天忍挫真英物厚地甘埋大丈夫  
無計發潛空涕落雨松霜栢照烟蕪

賦江郊漁弋

占斷江山是一家寄情漁弋當生涯青楓翠竹春屏葉  
白藕紅菱曉鏡花鴻鵠鷓鴣鴈鷓鴣鱒鮒鯪鯉鱈鱉  
河陽書到君當起弩發千鈞釣五車

豫章

郡名猶是漢流傳  
宇宙江山復幾年  
畫閣倚空家十萬  
紅妝鬪夜妓三千  
層城歌舞秋風外  
故國興亡夕照邊  
近歲潯陽成重鎮  
鎮南烏幕鎖蒼烟

贛上思親

庭下青萱意自舒  
起居近日復何如  
薰香莫遣衣篝潤  
餌藥從知酒琖疎  
教婦丁寧惟禮法  
要孫久遠是詩書  
手中綫在常珍重  
空寫平安託鯉魚



章貢祥符吳道士嬾窩

半年收得自由身，坐斷窩中嬾是真。  
日短日長唯守靜，雲來雲去不生嗔。  
破除機械鷗盟熟，脫畧錙銖鶴料貧。  
舊看黃庭猶忘却，應無心力對閒人。

江湖偉觀

世間無盡是天游，更出湖山最上頭。  
江面春聲潮卷雪，湖心寒影月澄秋。  
海門舟楫雲開見，瀛嶼亭臺水載浮。  
不比錢塘歌舞處，遠懷西北有神州。

送徐權院奉戶檄之九江等郡

中邊瑩徹似冰壺空盡時情意氣殊已向銅龍梯要路  
又隨玉馱駕征涂風生湓浦江流急雲滿康廬夜月孤  
竭到東南無力了一分寬處是規模

蘭

野客過門叫賣蘭清風便自逼人寒孤根未必靈均種  
推作離騷輩行看

聞雞

不因風雨不分明  
羞殺譙樓打亂更  
世上公侯多改節  
無人肯聽丑前鳴

晉武帝

秋風銅爵曲池平  
吳主宮娃滿掖庭  
憑仗皇孫聰慧早  
不知禍在夕陽亭

左太冲

辛勤十稔賦三都  
聞者曾貽酒瓮書  
它日洛中添紙價  
陸家兄弟竟何如

朱彥和

文如玉海動時流曾以書棋伏隱侯武德閣前消幾語  
却令梁氏缺金甌

任蠻奴

千里旌旗已渡江蠻奴苦諫喚蕭郎却持官裡黃金去  
望拜韓擒石子岡

敬微

受用廬山水石竒亭亭霞外薜蘿衣侍中那抵蘇門障

笑死丹青陸探微

鄧郁

雲母餽糧五嶽樓繡娃少嫗尊仙遊不應輕信雙青鳥  
便遣東都事業休

石崇

梓澤神仙第一居爭豪不惜碎珊瑚荆州使客知何罪  
未必亡身為綠珠

張茂先

辨精龍肉亦奇才雄匣干將耿不回只守鷓螟蚊睫賦  
天星未必折中台

王夷甫

玉塵消搖吐妙言清流都指作龍門白頭苟活尊胡虜  
夜半排牆未是寬

張曲江祠

延英幾度獻忠言白羽他時賦感恩自是三郎真屢錯  
却將天寶換開元

貪泉

千古遺蹤散曉烟  
空餘兩字寺門前  
世間貪者滔滔是  
何必俱曾飲此泉

送衡山琴畫張道士二首

滿天風月澹消騷  
三尺孤桐古調高  
不敢問君聽別操  
請彈二十五離騷

滿空烟雨澹模糊  
三尺霜縑老墨枯  
不敢問君求別景  
請描七十二峰圖

桂村

剪剪霜風起晚吹一溪流水浸寒暉  
客衫猶恨吳綿薄不道邊人盡鐵衣

利州進馬

靈關玉壘自崔嵬誰向西邊起禍胎  
萬里望堯通一祝天基御馬利州來

過綠野

世上今無隱退風地名偶與午橋同  
往來怕看銅駝陌



閒倚柴門憶晉公

西湖

高價租船作勝遊  
窮逋那敢鬪風流  
西湖多少閒春水  
不洗中原二百州

望和靖墓

孤山擎出水中天  
留下梅花代代香  
滿酌湖波遙一醉  
問咸平事已荒涼

九里松

松是山靈一手栽堯天長就棟梁材龍髯怒起春風急  
似怪遊人喝道來

此五十詩老坡所謂淘鍊銀耶古如洞庭樂其思幽  
律如嶰谷箛其和宣絕如喬木嚶其音活非今調名  
曲耶性之云擊壤曲也扣角曲也一性情也蓄為心  
曲發為歌曲曲而不屈曲之真曲能有成曲之神神  
難言真在人何惡乎曲云曰曲義則美皇荅公里請  
奏曲終雅而易名以大聲性之不磨淳佑辛亥臆小

山蕭泰來書

江湖小集卷十三

欽定四庫全書

江湖小集卷十四

宋 陳起 編

胡仲參竹莊小藁

宮怨

淚粉羞臨寶鑑前  
淡粧爭似舊嬋娟  
一言曾忤君王意  
閉在長門十五年

寄竹院方丈字師

江湖歲月易消磨  
振錫歸來鬢欲皤  
性懶吟編多散逸

門間俗客少經過  
虛檐破處懸蛛網  
落葉空中見鳥窠  
一片師心誰會得  
半窻竹影綠婆娑

郊行暮歸

吟罷歸來興欲狂  
重城半掩傍昏黃  
鐘聲遙動山靈答  
月魄未高人影長  
竹葉淺斟杯量窄  
梅花滿插帽簷香  
不妨竟日酌心賞  
纔到明朝事又忙

偶得

欲問梅花信  
山寒去未能  
靜思天外句  
坐對夜深燈  
戒

酒頻添袖煎茶旋鑿冰月殘霜又落無復叩門僧

醜婦吟

君不見漢殿丹青未漫滅馬上琵琶向誰說又不見華  
清舞破霓裳衣凌波竟墮鬼山血從來艷色多累身妾  
貌雖醜心自悅幽閨到老無人知白髮如絲鏡如鐵

晚雨

勃姑鴟舅叫樓西春色陰晴景不齊濃墨四垂收未起  
明邊一片夕陽低

端午

千年流水去滔滔此日人來弔汨濤  
江上畫船無買處  
閉門風雨讀離騷

山中作

村居便野性况復是清秋為愛山間好因成旬日留  
林深喧鳥雀露重滴松楸昨夜新寒入篝燈覆敝裘

入京第一程

六載館杭州重來訪舊遊山中纔過雨客裡又驚秋  
嵐



氣蒸衣濕泉聲激石流功名苦行役羞見渡江鷗

道中早發

未曉催行色微吟獨據鞍露垂星影濕月淡水光寒犬  
吠知村近雞鳴覺夜殘親闌在何許誰念客衣單

秋晚汎湖

載酒湖邊買小舟水光山色解人愁短籬寂寂菊花晚  
兩岬蕭蕭楊柳秋落日波間收戲鼓暮烟林外出歌樓  
倚闌長嘯西風裡驚起前汀雙白鷗

試後書懷

踏遍天涯路，春三秋又三。  
文章與時背，言語對人慙。  
湖海氣何餒，山林分未甘。  
閑僧時過我，揮麈共玄談。

夜坐偶成

一字吟難穩，沉沉夜向闌。  
燈明妨短夢，衣薄犯新寒。  
千里家山遠，三年客路難。  
明朝有佳便，尺紙報平安。

送諸葛春卿還里

扁舟分袂出湖濱，我向吳中君向閩。  
自笑吟身猶是客。

却來遠道送行人家山會友憑傳語旅舍逢詩為拂塵  
天北天南相憶處梅花毋惜一枝春

得家書

手剥鱗緘細細看北堂垂白喜平安為憐客裡多霜雪  
寄得衣來正及寒

雪晴汎湖

雪後湖清淺令人心眼開林疎知寺近冰合礙舟回寒  
色欺吟鬢斜陽入酒杯山行已清絕况復是尋梅

春晚見山茶花一枝獨開

茶蘼開盡見山茶血色嬌春帶雨斜  
莫是今年逢閏月東風吹到背時花

山中口占三首

四野平田春水肥前山隱隱帶殘暉  
千林晚色無人共時有樵翁獨自歸

躑躅花開野色濃和風和雨卧叢叢  
城中只買零枝看那似山頭滿樹紅

飯罷呼僮旋煮茶  
碁枰詩卷小生涯  
從今厭踏紅塵路  
多在山間少在家

夜坐即事

午夜空庭寂  
心閑坐亦忘  
竹間風動靜  
雲裏月行藏  
驚鵲出幽樹  
寒蟬語廢廊  
甌茶脚當酒  
清氣入詩腸

題墨梅竹

洗盡丹青料  
清高絕點埃  
數竿無韻竹  
一樹不香梅  
與可今已矣  
補之安在哉  
千年好風致  
喚上筆頭來

聽雨

聽盡燈前細雨聲  
聲聲總是別離情  
何時斷得閑煩惱  
一任芭蕉滴到明

夜坐與伯氏葦航對床閱江湖詩偶成一首

對床因話弟兄情  
話到山林世念輕  
几上江湖詩一卷  
窓前燈火夜三更  
茶經未展神先爽  
香片纔燒味較清  
吟罷忽聞譙角動  
石橋霜曉有行人

薄暮

薄暮抱幽獨無言倚小樓日沉千樹晚風起一天秋  
發言  
枕團新夢寒衣帶舊愁祇因吟太苦餘病未全瘳

山行

石磴手難攀林深去復還人行啼鳥外僧住白雲間  
野  
興平秋水吟魂繞暮山馬頭風作惡潘鬢任闌珊

月夜聽琴效漁父辭

風入古松成節奏泉奔幽磴響琮琤琴中彈意不彈聲  
猛拂朱絃燈焰落細敲玉版夢魂清啼鳥枝上月三更

寒中偶題

酒對紅爐煖香凝繡被温  
老天有私意寒不到朱門

枕上得句寄潛君升

無奈蓬窓雪打聲  
夢魂纔穩又還驚  
枕衾如許猶嫌冷  
多少間間睡不成

留宿陳氏書齋

因訪吟朋到竹居  
春寒策策動窓虛  
幾番好雨偏留客  
一盞青燈共讀書  
徐孺舊曾親下榻  
陳遵見說好投車



與君靜夜評心事萬斛閑愁盡掃除

遊白石山觀音寺

綠陰深處石橋橫纔入山門意便清林下一僧無箇事  
時來倚樹聽泉聲

與生上人

久住深山裏相忘物外形逢人出好語入定掩殘經古  
字碑成軸名詩榜作屏欲知祖師意栢樹在中庭

生公  
以右

軍帖軸之几間復以李涉  
游霍林寺詩為屏故云

雨中

愁坐黃昏掩客扉  
風翻霜葉滿庭飛  
孤燈挑到寒更盡  
猶有行人帶雨歸

讀岳鄂王行實

飛鵲來何意英雄此日生  
山河張膽氣宇宙載風聲  
一片堂中紙千年身後名  
至今墳上木猶作不平鳴

和林梅臞西淙瀑布圖韻

瀑駛驚風雨危懸峭壁前  
臨流清客耳入夜攪幽眠  
旁

是龍為廟高疑山有仙一塵飛不到長似九秋天

喜郭希范自上庠歸

馬蹄明日是君家千里歸來傍節華  
幾夜深闌寒寂寂  
有人和淚卜燈花

用伯氏韻柬梅臞

楫拙爐前坐夜深寒侵窻戶月西沉  
冥搜天地無窮趣  
寫盡江湖一片心  
霜葉落邊添客思  
梅花瘦處動高吟  
訪君欲問推敲訣  
擬把清樽共細斟

東竹院字老

別來旬日許又過一分春因感塵中事空慙物外人吟  
清便境靜語苦見情真近况知何似篇詩得細論

送梅臞還三山

十年湖海上此日值梅兄一見纔傾蓋相逢又問程新  
編聯畫卷清話入詩評從此雲山別因風時寄聲

題雪舟雲心二友吟卷

君詩何所似絕似晚唐詩寫出春雲狀融成白雪詞百

篇多態度二妙一襟期與我為三友他年題呂誰

時二  
公約

刊三  
友集

清明

杯酒濃澆壠上春東風吹起紙灰塵  
可堪腸斷中原路  
草掩荒丘不見人

寄黃雲心

竹屋少行跡閉門春晝長  
天時半晴濕人意共炎涼  
苔蘚侵階綠茶蘼壓架香  
冥搜尋杖屨不為看花忙

采桑女

葉滿筐箱花滿簪  
低頭微笑出桑陰  
後來若有秋胡子  
說與黃金必動心

過永春縣

距城纔百里世路便難平  
碣石唐人墓桃源晉地名  
危譙依嶽勢荒市帶溪聲  
往日罹兵火頽垣蔓草生

圩田

圩田依澗水  
入夏未栽禾  
不是春耕晚  
山中寒氣多

閨中詞

寫就相思字燈前帶泪看欲緘還未忍少待泪痕乾  
聽盡芭蕉雨愁人夜不眠凭誰將此意為妾到郎邊

早發

早發六七里前途曙未分漁舟依岼立水碓隔溪聞獨  
樹支殘月空山半白雲清晨那可駐日出又如熱

無題

露重濕征衣風急翻紗帽山下灌園人倚鋤看馬過

過界首

幾重嶺隔幾重灣  
路入濛濛烟雨間  
獨立溪橋重回首  
前頭已是劔州山

思家

夜夢到山居  
回頭千里餘  
屢傳歸去信  
不得寄來書  
小徑應添笋  
荒畦欠理蔬  
客程頻得雨  
田里事何如

漁梁嶺禹廟

古今陳迹幾興亡  
闔嶺何因祀夏王  
莫是當年平水日



曾驅魚鱉渡漁梁

陵上 釣臺後

自為功名役因思隱者賢只行山後路羞過釣臺前

西湖會上和趙靖軒韻

不著人間半點愁每於勝處一凭樓吟邊只欠林和靖  
座上追思馬少游暈臉芙蓉酣薄暮低眉楊柳拂新秋  
酒闌拍掌狂歌舞自是忘機可狎鷗

秋意

梧葉飄殘客夢驚擁衾危坐到天明  
片心除是眉頭識  
萬感都從念脚生  
江上鱸肥銷旅况  
樓前鴈過帶邊聲  
挑燈無語閑商略  
謀國謀家底計成

還趙靖軒吟卷

借得君詩在案頭  
篝燈夜夜看銀鈎  
苦吟暗數秋更盡  
何處笛聲人倚樓

重陽

漫浪江湖已十霜  
一秋強半又重陽  
可憐白日渾閑度

偶對黃花覺自傷  
客舍題詩書感遇  
市樓沽酒慰淒涼  
登高不為酌心賞  
直欲凭闌望故鄉

夜來聞曾性之丘君就二友隔樓吟聲不絕以  
詩柬之

月下歸來深閉門  
衾寒時倩博山溫  
隔樓忽聽吟聲苦  
引得清愁入夢魂

問性之病

莫向推敲苦用心  
聞君病裏亦沉吟  
書燈挑盡無人共

藥鼎煎殘到夜深  
霜後菊花方寂寂  
鵲前梅事又駸駸  
相看咫尺如千里  
幾度逢人問信音

過千頃寺訪谷隱老

別久交情淡  
重來似舊時  
人生雲聚散  
世事月盈虧  
茶具權行酒  
禪牀借看詩  
漫天多雪意  
預約探梅期

性之尋梅歸來有詩因感一絕

處士廬前門  
逕深僅留佳句  
與人吟孤山  
近日無行路  
踈影暗香何處尋

枕上偶成

客樓蕭索抱愁眠，鴈過聲聲到枕邊。  
念脚動如魚撥刺，吟身寒似鷺聯拳。  
匣中幸有劉琨劍，囊裡猶餘杜老錢。  
忽憶西山山下路，夜深霜露滴松阡。

夾河中有矮道人自住小舟，持咒為生人莫不異之者。

道人神貌古，雙鬢欲垂肩。  
坐席容三尺，浮家住一船。  
養生憑佛果，持鉢信人緣。  
早泊橋梁下，蓬頭起白烟。

寄嬾菴

天寒日短道路長白雲飛處知吾鄉大江之東渭之北  
念我故人何可忘別來楊柳春依依只今開到梅花香  
扁舟漫浪歸未得京塵海裡安行藏身名未立仰天笑  
牀頭夜夜鳴干將音鏘羨師物外無寵辱庭前栢樹常蒼  
蒼吁嗟念羽飛不到二千里外空相望五雲前墜滿室  
光報師之意無以將篇詩濃墨纔淋浪一聲鴈過天南

翔

偶得

挑燈伴寒夜兀坐竹壚邊赤脚知吟苦時將山茗煎

和性之見寄韻

窓燭銷殘轉寂寥柴門無復野僧敲偶來枕上吟詩就  
記向心頭欠筆抄鳴竹數聲疑雪片尋梅清夢到山坳  
世情雲雨多翻覆誰是江湖耐久交

遊山中

世途平處起波瀾輸與高僧占好山竹塵直為揮俗具

金匱要略卷十四  
卷十四  
槿籬虛設掩塵關  
林泉有分酌清供  
瓶錫無人伴此間  
擺脫名韉須早計  
半生猶得住雲間

寒夜作

生計尚茫茫  
微吟思故鄉  
羈愁消不盡  
寒夜未為長  
門掩梅花月  
禽翻竹葉霜  
挑燈裁錦字  
明發有歸航

讀秦紀

萬雉雲邊萬馬屯  
築來直欲障胡塵  
誰知斬木為干者  
只是長城裏面人



雪

凝雲商作雪頃刻滿天涯  
片片疎還密霏霏整復斜  
映窻疑月影著地似楊花  
四望渾同色微茫認點鴉

用馮深居韻題莆陽章氏琛翠樓

百尺危梯渺海寰  
闌干十二盡青山  
烟光濃淡藏多景  
野水周遭匝四環  
勝地只宜騷客住  
老天未放主人閒  
憑誰說與九仙道  
方丈移來在此間

書懷呈曾性之

覽鏡歎頭顱梅花一樣臞  
病因吟後有愁到醉邊無心  
事歸梁燕年華過隙駒  
世途難著脚况復是江湖

和伯氏春雨中韻

癡寒脉脉壓晴莎  
春漸三分景未和  
待得濃陰收拾後  
花邊春色已無多


兩隄楊柳拂新亭  
怪底遊人懶踏青  
手撚梨花成小立  
半窻湖水雨冥冥

寄梅臞

別去忽經旬，春風閱二分。  
幾番吟對雨，獨自暗思君。  
客裏加頻病，愁邊駭近聞。  
倚闌商不得，心目亂于雲。

和伯氏包山觀桃花韻

因訪桃花到嶺根，御林春色此平分。  
千株未數栽唐觀，一幅猶堪畫晉源。  
仙在雲間無處覓，人行風外有香聞。  
笙簫隱隱宮城隔，立盡黃昏更斷魂。



江湖小集卷十四